

光緒永嘉縣志

永嘉縣志卷之二十二

古蹟志二

金石上

金石之學自宋歐陽公集古錄始趙洪諸家繼之

國朝作者林立不下數十家兩浙則有阮文達金石志著錄温州者凡四種餘皆未及采輯咸弼曩著東甌金石志十二卷一郡古刻梗槩略具今錄其在永嘉境者自晉迄元得六十餘種略存箋釋前明及

本朝石刻依次附書間有僅列碑目不錄元文者因目而求其文則有金石志在

晉

昇臺二字 佚

〔府志〕昇臺在飛霞洞側劉根昇仙處巖上錢昇臺二大

字蒼古異凡筆〔天下名勝志〕飛霞洞晉邑人劉根隱此

〔東甌金石志〕案此二字於道光間巖石頽壞今已無存

宋

謝康樂飛霞山題字 巖高一丈四尺上廣五尺八寸下廣七尺六寸篆書謝字徑三尺一寸客

字徑三尺四寸巖字徑四尺九寸

謝客巖

右謝客巖三字在飛霞洞之右巖石壁立如穹碑大書

深刻蒼勁異常天下名勝志積穀山有謝客巖謝靈運
書白雲曲春草吟於石崖今已蕪沒惟謝客巖三篆字
尙存今攷此三字無年月亦無款識相傳爲謝公書當
非六朝後人所作也

金石志

下同

謝康樂白雲曲春草吟

佚

見上

吳越

錢鐸康樂巖題記

六行行七字至十字不等
篆書徑四五寸亦不等

鐸自庚辰載領郡於康樂

巖重剏亭臺遍植花柳

兼華蓋山畔建置菓園

□□□修冀添奇章時

甲申歲清明日彭城

輔軒記以示後來

右錢鐸康樂巖題記在積穀山麓飛霞洞之左阮相國

〔兩浙金石志〕云郡縣志載鐸爲武肅王兄咸通間領郡

事此題甲申者乃咸通五年也元案十國春秋鐸字輔

軒武肅之胞弟多藝善畫繪承制累授溫明二州刺史

封楚國公開運二年卒年五十五據此鐸當生於唐昭

宗大順二年

今案鐸當生於景福二年

其任溫州刺史在武肅建號

改元之後庚辰爲天寶十三年卽後梁之甲申爲寶大
元年今臨安海會寺經幢寶大元年歲次甲申是其證
也

吳越王金塗塔記塔高工部尺四寸二分上下四層下一層塔座第三層每面有佛像三第二層中鑄梵夾故事上一層平其頂頂上出四角角三棱外入面面各一金剛立像款識在腹內正書四行首行四字下三行行五字字徑四五六分不等

吳越國王

錢弘俶敬造

八万四千寶

塔乙卯歲記

右金塗塔藏郡城王潤蘭家銅質古色斑然據表忠譜
上有相輪七級今已平禿有斷缺痕宏俶字文德武肅
王孫塔造於乙卯爲嗣立之八年周之顯德二年也

宋

大禹王廟石塔殘字

塔今存五層高約七尺凡八面每面
寬二尺許字僅存四面可辨者止一

百五十四

字正書

乙

一行闕

日甲寅立

二行闕

口熙四年二月十三日記句當僧

三行闕

皇帝聖壽併口入會官員信士等

四行闕

右第一面

內品 一行闕 內品守內 二行闕

內品守內侍 三行闕 十字

務徐洪

承奉郎守秘書省□□監温州鹽酒稅務韋成象

宣奉郎守著作佐郎監温州商稅□□□元玘

殿前承 旨温州兵馬□□兼在城巡檢燕守則

承奉郎守太子□□□□軍州 下闕

右第二面

右石塔在東門外大禹王廟殿前太湖石造志載大禹王廟在海壇山上宋雍熙四年建此幢紀年熙字上必是雍字蓋同時所造第三第五兩面皆記文剗削過半

不成句讀所存宋初官名姓氏皆舊郡志所佚猶可考
見一斑也

謝泌謝客巖詩刻

六行行七字至一字正書左文

舊刻巖前文字在登臨盡日動悲辛子孫千載知多少只
我今來嗣後塵

遠孫泌述

右刻在飛霞洞謝客巖上方側面下有遠孫泌述四字
意其爲謝泌所作宋史泌字宗源歙州人登進士第歷
事太宗真宗拜左右諫議大夫任直敢言歷知同虢湖
福襄五州咸平五年同知貢舉由通進銀臺司出爲兩

浙轉運使徙知福州此必道經永嘉時作也

邊調飛霞洞題名

四行正書上兩行行六字後兩行石泐過半共存一十四字

天聖七年正月十六日邊調率胡昉□□□□□□

右刻在飛霞洞崖上高處邊調以太常博士守温州見

〔郡志〕胡昉見〔浙江通志〕碑碣門有上虞縣等慈禪寺釋

迦文佛像記慶厯五年太常博士胡昉記當卽此人

曹觀飛霞洞詩刻

五行上四行行七字
第五行二字正書

巖前春草萋萋色巖上春風淡淡陰數百年來無謝客□

□依舊到如今

曹觀

右刻在飛霞洞內左壁觀字下似尙有字不可辨孫同
元永嘉聞見錄云謝巖崖上石刻篆書二其一云棘丞
薛孺卿邑宰陳紱之簿曹觀尉高汝天聖十年二月九
日俱右行陳字下一字不可識今此刻尋訪未獲惟觀
題詩存意其同時所作曹高二人舊志失載

馬尋等謝客巖題名

四行正書左文

馬尋左瑾董元亨同遊慶厯甲申季冬十二日題

右刻在謝客巖磨崖大字之右當客字之旁馬尋須城
人知湖撫汝襄等八州厯提點兩浙陝西刑獄廣東淮
南兩浙轉運見宋史左瑾以都官外郎知温州軍州事

董元亨寶元慶厯間通判

劉述飛霞洞詩刻

六行行四字至九
字十字不等正書

重刻孫謝二公詩

吳興劉述

漢興文藝推儒首諫議才能□□師更向謝嚴鐫麗句清
風千古照江湄

皇祐四年十月十五日

右刻在飛霞洞內右壁宋史劉述字孝叔湖州人舉進
士爲御史臺主簿知溫耀真三州此詩題字云重刻孫
謝二公詩其首句云漢興文藝推儒首未知所指何人
孫謝二公詩亦無存不敢臆斷次句云諫議才能當指

謝諫議泌彼詩或是劉君補刻也

廣福寺石塔殘刻

大宋皇祐甲午春二月

寺在芙蓉山有石塔六角今存一截面面有字此其紀
年也皇祐甲午實至和元年

僧利卿并闌石刻

七行行字
不等正書

開元寺僧利卿謹捨淨賄壹拾叁貫文有餘重修義井一
口并置井闌甃砌等所期福利上答四恩下資三有者
時至和元年甲午歲十一月二十七日題記耳

右井闌石刻在飛霞山下今東山書院謝公祠前半在

牆外爲人所共汲故曰義井

陳求古等飛霞洞題名碑

六行行十一字正書徑三四寸不等題名二字橫列於上徑七

許寸

至和二年歲次乙未夏六月

題 下旬休新釀報熟佳果探成

清泉可漱芳樹堪倚郡守陳

求古率通判王希顏邑令孫

名 奕台幙陳確從事趙頡杜仁

壽會於巖石之上醉書以記

右碑在飛霞洞內堵塞洞口前築神座高廣難計陳求

古字師之閩州曲水人同中書門下平章事堯佐之次子此其守温州時所題台幙蓋台郡幙官

鄭賡等飛霞洞題名

三行行十字正書

至和二年十有二月望日

鄭賡王奎軫林瑾沈珙同飲餞陳象古妣知本知讓

右刻在飛霞洞內左壁曹觀題詩之次鄭賡卽隱逸傳之鄭泰臣象古爲堯佐少子求古弟也知本求古子也妣玉篇或音逸同姪

韓奕等飛霞山題名

三行行九字正書

丙申閏三月十四日永嘉令韓奕尉刁縞進士鄭前石不

疑同游謝巖

右刻在飛霞山麓磴道旁韓奕見至和二年仙巖題名
則丙申爲嘉祐元年也尉刁綸舊志失載

任達等飛霞洞題名

五行行九字
正書左文

提點刑獄度支郎中任達按部永嘉同郡守尙書郎黃賁
通判尙書外郎齊景倩遊此熙寧庚戌秋八月二十八日
題

右刻在飛霞洞錢鏐題記之右兩崖相附麗任達爲兩
浙提點刑獄通志失載

淨光塔塼

熙寧王子重建淨光塔塼三種

文見東國金石志

元祐五年淨光塔塼三種

右淨光塔塼塔在松臺山巔初建於唐元和中爲宿覺禪師真身塔賜名淨光其後重建於熙寧五年歲在壬子下距元祐五年庚午蓋十八年

證覺院鐘款

上下八區高廣不計

勅賜□□□恭爲祝延

今上皇帝聖壽福及郡縣文武

官僚六軍萬姓鑄造鴻鐘一口

皆元豐七年六月初一日誌

右第一區

當院比丘靈晟施淨財鑄造銅鐘一口所鳩鴻福上荅四
恩下資三有及法界舍生俱霑妙利者

右第二區

已下第三第四區僧
名及助緣姓氏不錄

縣尉王丙

主簿張廉

宣德郎知永嘉縣事周革

朝奉郎通判温州軍州兼管內勸農事輕車都尉賜緋魚

袋唐發

朝奉大夫知温州軍州兼管內勸農事上輕車都尉借

紫姚原古

右第五區

其第六區施錢姓氏三行不錄見金石志

孫詒讓案鐘在永嘉十三都鵝頭頸村密印寺

俗稱頭陀寺

鐘鉦間界爲八區其二區無字第一區云勅賜證覺院

云云舊府志寺觀門無證覺院未詳其所在

近謝君文波所得證

覺院浴堂記卽此二字則當在相溪矣

國初時瑞安林法幢宮詹增志削髮於密印寺購得此鐘見本寺周止庵副憲應期所作碑記光緒庚辰五月詒讓遊密印寺見此鐘手拓其文讀之勅賜下證覺院三字已爲寺僧磨去滌塵諦審其字跡尙約畧可辨第五

區列温州郡守以下官僚銜名以舊府縣志攷之元豐
間有郡守姚元吉以朝散大夫知益卽姚原古之誤原
元音同古吉形近故致譌舛當据此鐘正之通判唐穀
永嘉令周革並見郡志簿張廉尉王丙並郡縣志所無
當据此補錄也

吳君平飛霞洞題名

四行正書前二行字徑四寸後二行字徑一寸

令吳君平常父遊

元祐二年丁卯冬至後一日

叔賢侍

右刻在飛霞洞內右壁劉述詩刻之前叔賢疑吳君之
子

莫和中等飛霞山題名

六行行字不等正書前四行字徑三寸六七分後二行字略小

提點刑獄莫□中知軍州事劉德父通判張資深知永嘉
吳常父同遊

元祐三年閏十二月十六日

右刻在飛霞山麓首行第六字正當石泐處僅存一勾
別考湖州府志藝文略有莫君陳字和中疑卽和字和
中元祐時人授知婺州不言其爲提點刑獄豈嘗任此
官按部來溫而留此題歟郡志知軍州事有劉敦疑卽
德父通判有張逢疑卽資深吳常父卽君平見洞內題
名皆元祐時官溫州

永嘉水則

四行正書徑四寸五分下平字大倍之

平字上高七寸合開陡門

永嘉水則至平字諸鄉合宜 平

平字下低三寸合閉陡門

宋元祐三年立

右刻在譙樓前五福橋西北第一間第一條石柱上北面舊志作第二間誤末一行今又可見

鐵井闌外題字

元祐辛未僧子暉將楚環陪庫錢銀做此井并依明堂所置

井在城東南隅興文坊小巷內俗名鐵井闌井口四圍用鐵鑄成大圓井闌口徑五尺下徑七尺圍一丈六尺高二尺五寸厚七寸外有元祐辛未云云二十三字永嘉聞見錄云鐵久剝蝕字多模糊約略摹寫蓋以目驗得之者而字之大小及行數均不著錄時在道光中葉咸豐中居人復於鐵闌外周遭甃以青石字爲石掩不可得而見矣

大廣化寺石橋題字

字橫列左右橋眉書徑五六寸

弟子卍世通并妻黃三娘男亞沔等同心造石橋一所奉
答四恩三有者紹聖元年甲戌八月七日建

大廣化寺在五十都

雙蓮橋石題字

五字正書徑可一尺許

宋宣和貳年

橋在城南玉蟾河上石長約五六尺橫墊橋柱中秋冬

水落時可見當是脩建時所題後人置斷石於此

開元寺鐘銘款識

鐘高一丈八尺五分上圍一丈一尺四寸下圍一丈五尺五寸四分腰橫起四棱分

上下層共界爲十二區每區間以直棧三銑厚四寸行字不等皆正書助緣姓氏不錄

建炎二年歲次戊申二月二十四日

恭爲祝延 今上皇帝萬歲福及郡邑官僚六軍萬姓

前資住持都幹當臣僧 道圓立

龍泉寶鐘宣和辛丑壞於賊火道圓閔法器之無傳遂出
方而新之鄉貢進士蔣偉謹稽首爲之銘曰

真空無相 託於有形 妙用難言 傳於有聲 形聲
不滅 法也大成 叩之鏗然 非雷非霆 息苦警情

通幽洞靈 何千萬年 永鎮明庭

都勸緣廸功郎新就差監明州鹽倉劉謙施一百貫

廸功郎縣尉盛 奕修

廸功郎主簿呂 恭問

儒林郎縣丞何 執藝

宣教郎知縣主管勸農公事兼監鹽場詹夫

前資住持常裕元豐庚申正月廿四日施五百千鑄造宣
和辛丑兵火燒壞收拾餘料仍千信人重鑄彫將功德薦
常裕院宰并幹當僧熙坦

承信郎新差福建路提刑司准備差使萬祥施一千

右銅鐘在城習禮坊開元寺銘辭年月外徧鑄檀越姓
氏茲錄職官銜名并重鑄云云餘從略舊志及府志知
縣詹夫作詹夫丞簿尉三人均失載今藉以補正

高宗御題清輝二字

二字平列行楷書清字徑一尺四寸五分輝字徑一尺五寸五分

清輝

右榜在孤嶼龍翔興慶兩禪院佛殿正中高宗航海南

來次江心寺所書有清輝浴光四字因建清輝軒浴光
精舍在普寂院中惟清輝字存今於光緒三年摹勒上
石巡道方公鼎銳題跋下方嵌入江心寺僧房壁間

護國寺鐘銘

形製同開元寺
鐘文多殘闕

時紹興二年歲次壬子十月二十二日記

當山前任持傳教賜紫惠海大師起賢施銀財二十千助
成勝事願法界衆生聞此鐘聲咸生佛國

重修廣大圓滿無礙大悲心大陀羅尼三昧鐘

下闕

方等住持壽寧教院傳天台教觀賜紫佛辯大師忠告述
右銅鐘在西山護國寺此數行字尙完好餘助緣人姓

氏晨星零落似經鐫削者然康熙間閩藩之變僞都督
曾養性攻溫州屯營西山蓋爲賊兵所損

釋青了開井發願文

文刻井中行款不計

皈命頂禮徧滿法界十方三世諸佛如來大乘至教秘密
真詮甚深法寶十方和合大菩薩僧同錫洪慈證知我今
開井志求洪泉現在未來饒益一切我居茲地江水回環
由有高峯孤然秀出伽藍久剏其已歲賒一衆僧居乏水
飲用我諦詳審乃禱觀音於此山心祈求清水興二七日
感夢吉祥後方見泉洪漸而大但當仰荷佛力沾濡於一
點中流出無盡如我觀察無異思惟以仗願言莊嚴佛果

願此泉水流注無窮通徹金剛輪際乳海具足充滿八功德泉涌現井中常獲盈滿願以此水盡未來時供給往來十方清衆餘沾遐邇一切等人一滴所滋成佛緣種願以此水廣益衆生飲此水時如味甘露悉令增益色力命安咸悟妙心發生妙慧願飲此水皆得智漿流灌心田道芽增長諸根明利正念圓成深遠法源傳佛心印願飲此水得大總持世世生生感通正法泛般若舟到無依處坐法空座建大法幢潤益衆生紹隆佛種願飲此水身心圓明與諸如來法流水接入佛慧海了最上乘等如來心齊如來見願飲此水生如來家受諸覺王法水灌頂獲無生記

登不退階莊嚴十方諸佛淨土願飲此水悉皆登於大菩提場齊成佛道坐菩提樹轉大法輪廣度衆生證寂滅樂然我今者觀性相空承佛威神故發斯願以無所得爲方便門於我身心都無所願我開井日光與諸天堅牢地神而有其約若得見水當於井中鑄佛密言廣發大願以鎮其底永作智山變此井泉俱成法水願皆安順同證作乘先作佛時遞相度脫如我此懇今已獲遂將此菩提善根普皆回向十方方法界一切有情衆生平等共有齊於實際徧於虛空三有同霑四恩共報怨親等及諸證菩提普願衆生咸登究竟

井在孤嶼龍翔院東文周遭刻於井內石上直下丈許
不得揭陽光激射始見字跡紹興七年青了奉詔開山
積土中川併龍翔興慶爲一江水鹹鹵不可食師致禱
觀音掘井得泉清冽而甘甌中泉味以翠微山玉眉泉
松臺山金沙井及此爲最

口之才聖女山詩刻

九行上二行存十一字三行至六行
各十字五律一首七行存歲月二字

末二行紀
年題名

大宋乾道叁年

之才

上關

右刻在賢宰鄉聖女山下淨靈寺西高巖上詩語淺俗

不錄之才不著姓或疑卽宋之才非也考之才卒於乾道二年此則三年也

大廣化寺題字三種

乾道三年丁亥

右在大殿下甬道石旁

女弟子舒二娘捨錢□□□

四恩三有乾道三年丁亥

右在寺橋外砌石兩旁

乾道五年己丑歲十一月初七日當院□□衣鉢錢
命工建立

右在山門石柱上

墓碑殘刻

石存方廣一尺六七寸字九行行楷書

上缺

口九年歲在癸巳

關

疾終於家享年四十有

關

四年

丁酉歲十月壬申

關

郭溪之原男一人鎬女

關

事郎江南

西路轉運司幹

關

口餘尙幼孫男二人恩哥

關

天性純孝

事舅姑如事父

關

日無間言治家有法和

關

口道而天殤

之壽鳴

關

右殘碑今在五十都某村金家踏步下考四年丁酉惟孝宗淳熙九年歲在癸巳則九字上必乾道也其子名鎬未知何姓各行下尙有一二字已滅矣

王煥章謝公像碑碑高五尺七寸七分廣三尺二寸一分像高四尺一寸六分慶元一行十字隸

書至正至順兩行存一十八字正書

慶元丁巳郡守王煥章立

右一行在像右

至正癸卯夏教授鮑□台郡范士闕

至順庚午仲闕

右二行在像左

右康樂像碑在郡學名宦祠像大頤方口美鬚髯手卷子左顧立精采奕奕惟左首上方石泐一尺六七寸此處舊必有題字碑初立於謝公祠元至正己丑遷於郡

學之先賢祠明成化中摹刻於孤嶼之謝公亭教授鮑
下一字剝蝕不可辨按明史鮑恂元至正中授温州路
學正而郡志不載此疑卽恂是時或又兼攝教授歟吳
永芳嘉興府志鮑恂字仲孚崇德人卽嘉興之石門也

鐵井闌內題字

五行正書徑二寸六分左文

慶元戊午年九月日常寺住山比丘重鑄

右題字在興文坊社廟前鐵井闌之內闌內外兩層皆
鑄鐵外層鑄於元祐辛未

前見

此層附益於內合觀前後

兩題字有僧子暉及住山比丘字舊傳爲開元寺香積
厨井良是題字無闕兩浙金石志於首二行及四行下

衍四方園坊社二字亦誤倒蓋訪錄者之過也

石砌題字

字徑六寸

嘉定戊辰歲二月日劉公九號

右在櫟溪白鶴廟邊水溝中

朱偉壙誌

高一尺六寸廣一尺八寸行數字數不計

有宋迪功郎朱公夫人解氏壙識

公姓朱氏諱偉字仲南行第十二世居永嘉之珍溪曾祖
旺妣周氏祖益妣劉氏父德真妣黃氏何氏劉氏封孺人
公夫人解氏同郡樂成解公元盛女也公兄弟四人長兄
早亡公年弱冠而失所怙躬勤家業酌應內外勉二弟通

及弼以刻意問學不使預生理事期於脩身成名植立門戶既而二弟俱有聲場屋聯翩仕版靖推厥由皆公力也嗣是家道日肥孫子日盛懽然友愛萃於一門同居無異財共食無異議自少至壯自壯至老融融怡怡和氣浹洽月旦之評咸曰朱氏兄弟猶有張公藝之遺風公處之裕如也故能涵養德性康彊少疾晚年雖徵坎軻未嘗輒親藥石而又得夫人左右君子動循禮法娣姒之門恬然一體而典型未亡豈不韙哉惜乎天不憖遺歲月有限弗克相與於無窮也公生於紹興壬子該慶典恩霈授初品官以嘉定辛未七月廿一日卒於寢享年八十夫人生於建

炎戊申先公八年卒享年七十五至是始得卜吉於呂公
山祖塋之右遂合葬焉嘉定甲戌十有一月廿四日也子
男三人長慶少殤次直方直大皆業儒孫男五人曰捷曰
應詳曰達老曰僊老曰挺翁女孫一人並幼將葬二孤移
書太學命姪婿內舍生陳欽實識歲月於壙欽實不得辭
里人新筠陽官王棟填諱

右朱偉壙誌及後朱弼朱通兩壙誌在四十一都廊下
墓蕪沒未有知者道光間朱氏脩家乘瀕竣矣其地古
樟大數抱無故自倒下露三壙共爲一穴碑石大小相
若錄其文仍埋而葺之

朱弼壙志

有宋監潘封庫朱君壙誌

公姓朱氏諱弼字文叔世居永嘉珍溪之原曾祖考旺曾祖妣周氏祖考益祖妣劉氏皇考德真妣黃氏何氏封孺人劉氏封孺人公配林氏同郡樂成林忠裔之女有子二人直諒直浩女二人長男娶李舒州之女孫也孫男建翁女孫二人公夙齡喪父卓爾強立隨仲兄宗教勵志就學年踰弱冠請鄉薦紹熙庚戌

允宗龍飛授福州長溪西尉洫官勤敏邊海救盜兩獲彊盜賞格咸該雅意不喜以人命易官爵故終不自列任滿

轉脩職郎辟差監兩浙轉運司潘封激賞酒庫公素恬澹
放佚巨園迄弗肯赴丐祠監潭州南嶽廟已而屏屛引養
者十餘載友於二兄季皆悼髦皓首怡怡終始無間言嘉
定九年歲次丙子八月九日不祿壽八十夫人林氏慈順
端靜待族黨咸睦撫婢媵有恩閭閻肅雝先公三月而終
享年七十其孤卜以己卯歲冬十有一月生明後一日丙
申合葬於呂公山祖塋之側姪婿國學上舍正奏名吳幼
存謹誌諸壙

右朱弼壙誌文中請鄉薦請字疑有誤李舒州名異紹
興辛未進士官舒州太守

崗頭井闌題字

嘉定辛巳歲正月立

右五十一都崗頭李宅街頭井闌題字

朱通壙誌

宋南外宗教朱公壙誌

公諱通字彥達小字文飾永嘉珍溪人曾祖旺祖益父德真俱不仕公登紹熙庚戌進士第歷信州玉山簿陞從政郎調福州益德丞不赴改南外宗教丐祠監潭州南嶽廟公夙志當世不卑其官筮仕簿領排異議釐宿蠹邑人德之上官有難事輒檄可否悉中利病譽薦溢至得丞篤手

足棄榆不忍離遂無意祿仕分教需遠次親故勉到官數
月輒解去奉香火緣樂餘年也性莊重平居揀語無窘步
料事精明裁決凜不可犯而奉親孝與兄弟友愛三荆合
芳年俱九袞同堂怡愉如少時人仰之目爲珍溪三老五
福嚮用自孝友中來施爲雖未竟而大節可覩矣嘉定丁
丑四月戊申卒於家年八十有四夫人余氏知英德府朝
散大夫閔之女警悟書耳目所歷皆省治家整不以絲粟
累夫子若奉菹蘭處妯娌敬共不怠公之孝友實相以成
後公七年卒甲申歲五月辛丑日也享年七十有五男直
清國學進士女長適上舍正奏名陳欽實次適脩職郎荆

門軍教授吳幼存孫男懷祖女一人呂戊寅十有一月癸酉殯於呂公山祖塋側卜者忌未窆寶慶乙酉七月甲申其孤奉夫人以合葬焉姑書梗概用藏不朽族子修職郎新福州古田縣主簿景彝謹誌

右朱通墳誌其外舅余閔隆興癸未未待問榜進士景彝嘉定丁丑吳潛榜進士

靈山院石門鏡紀年

紹定癸巳太歲

院在柑溪之蒼坡剏建於唐咸通間重建於南宋石門鏡一一鐫紹定云云一爲村人琢平鐫同治七年李某

捐錢若干重建等字

趙汝謐謝巖題名殘刻

五行首行十二字存九字第二行存三字第三行存四字第四行存

五字末行存
六字正書

嘉熙戊戌□□□郡守趙汝謐

事暇率

闕

春

闕

故址澄

闕

月明何處山

闕

春書

蠟石是日

闕

右刻在謝客巖巖字右旁文殘缺不可讀趙汝謐宋史

無傳郡志職官有郡守趙汝謐在嘉熙初年戊戌乃二

年也通志有汝談無汝謐郡志則無汝談按汝談之爲

溫守見宋史宜於通志郡志中各補一人

補闕薛公像碑

唐補闕薛公像

右碑在七聖殿巷薛公祠像端隸書六字兩行行三字
公名令之字珍君長溪人官左補闕開元初爲東宮侍
講題盤中苜蓿詩謝病歸後代遷永嘉薛常州季宣之
遠祖也此碑爲宋淳祐乙巳裔孫嵎礮石摹勒詳見壇
廟

真華觀石塔題字

四行
正書

弟子高文忠朱文廣共捨官會二伯貫助建塔基莊嚴福

壽淳祐八年三月題

塔在真華觀殿前今惟石座有字鐫於座

霞湜菴石佛背題字

七行字數不計正書

□□□卅□乘仍□考妣宗親願證

□□上品功成不朽崇奉□窮皆寶祐甲寅鵬月甲申

日□工磨礪□名于石

鄒宗安宗凱德□德青德成蔣□道德威□孫陳明□

右又□助建□□□□祈福壽增崇仗佛

右四十九都霞湜菴石佛背面題字甲寅爲寶祐二年

靈山院鐘銘款識

高六尺八寸上圍一丈一尺五寸八分下圍一丈五尺七寸二分銑厚四寸上

下各六區枚篆間界爲四行如開元寺鐘式行字皆不等正書姓氏不錄

聖宋寶祐三年乙卯歲十月二十八日辛卯

當山釋 妙明 募緣重鑄洪鐘仍建鐘臺恭祝

今上皇帝聖壽無疆福及文武官僚六軍百姓者

靈山院鐘銘

永嘉福壤靈山梵宮烹金大冶克就洪鐘擊于晨夕警彼
昏聩形模既偉聲韻唯雄聲生至寂韻合虛空永揚佛事
遐播真風拔幽塗之極苦祝叡筭以無窮

都勸緣大檀越

進士李夢零 太學生李夢鯉 鄉貢進士李夢發 登

仕郎李夢炎 進士李夢召 進士李夢圭 迪功郎李

夢震 登仕郎李夢霖 登仕郎李夢霖 已上共助錢
一伯千足奉爲增崇祿筭如意吉祥者

右銅鐘在孤嶼江心寺本靈山院物元時寺圯入江心
寺進士李夢霖李夢召李夢圭郡邑志選舉門俱不載
或是時鄉貢進士亦有此稱惟李夢霖登_宣祐丁未科
建德教授胡公墓碣

廬山江萬頃書

宋太學論秀建德府教授迪功胡公□□

孫詒讓案宋胡公墓碣在永嘉十四都慈湖南村碣文
二行十六字篆書徑三寸許末二字泐去不可辨右旁

題名六字正書徑二寸萬頃二字特小徑一寸略帶行
筆此碣不著年月据舊府志宋郡守題名有江萬頃咸
淳元年知瑞安府攷宋史江萬里傳云都昌人弟萬頃
官至正郎咸淳十年饒州城破軍士執萬頃索金銀不
得支解之卽其人也此碣蓋卽咸淳間守郡時所書都
昌與廬山相接故此碣自題籍貫卽稱廬山也胡公名
亦無考宋建德府爲今嚴州府檢萬曆嚴州府志宋教
授題名亦無胡姓惟萬曆温州府志宋論秀科有永嘉
胡萬或卽其人

觀善堂鐘款識

高四尺二寸下圍一丈界爲二層各分五區上層四區有字正書餘無

皇宋景定三年壬戌歲良月造

已上分三行各四字

祝延今上皇帝聖壽無疆

以上分三行首二字餘四字

觀善堂住持僧景全募衆成就

已上分三行各四字

信男李士恭同妻潘六十娘施叁伯券發揚莊嚴福壽

已上

分四行第二行六字餘各五字

右鐵鐘今在譙樓上觀善堂無考

大廣化寺七佛塔題記

七塔惟中塔及第五塔有字正書

李府知郡位安人梅氏法名

喜靜

施財建造

七塔寶塔莊嚴福壽咸

道丙寅季春六日立

右第四塔

當山比丘口口幹緣

右第五塔

通直郎徐公墓碣

二行行四字篆書大徑尺餘

宋故通直郎徐公墓

右碣在十四都慈湖南村山麓徐公名無攷增此

元

汪大有壙誌

高廣及行數字數不計行楷書

文林郎太學博士汪公壙誌

先君姓汪氏諱大有字中父曾祖昌祖伯達父浩迪功郎
一世祖由閩徙溫之固妙越六世至迪功癖地理諏葬親

兆於龔珏得汪灣之西識賢遷迺卜築於在城狀元坊迪
功娶葉氏封宜人生學錄伯氏山父次生先君俱從陸維
國先生游爲書學巨擘竹坡韓君分教吾邦奇而友之號
曰二汪先君以癸丑補上庠會同舍言忤奸全時亦與議
見幾而作聯丁艱棘服闋入叅選考口最咸瀘龍飛登乙
科初筮從仕郎慶元府觀察推官四明邸第權豪小官咸
俛仰之先君涖治燭吏戶之誣盜斥兩國謝氏之脅佃觀
文史公服其直口口晝曰公明以荐於朝旣而蒙川劉公
本齋陳公代分鄞閩留辟幹官時海寇交結表裏奪攘先
君振刷篙戶賊幟隨戢轉文林郎除國子錄行太學博士

不就迺旋祖屋營別墅自號梅邊居士丙子冬仲岷麓家
公下鄉城則堂憲溯東時曾舉先君爲十五士之首岷麓
用有舊藉以遠官卒莫逃乎數丁丑十一月二十五日也
嗚呼尙忍言哉先君生於甲戌十二月三日享年六十有
四妣包氏先半年卒男四人長瑞次壽繼亡次福亂離莫
稽所徙女三人長適明經戴氏次適白石蔣氏次適黃塘
夏氏孫男二鄞馨孫女一彩不孝男崇疆承速貧之餘不
克襄大事忍死卜以己丑十二月庚寅合葬於故里之西
岡從先志也姑叙梗概納諸壙學生前奉議郎朱檠填諱
四十一都東漿奧些地中初不知有古壙也術者謂是

處可卜兆咸豐間或掘之得石砌又掘得此誌兩石相合剖之金書燦然如新筆意雋永有晉人風範

李永孫壙誌

十七行行二十
四字行楷書

李氏出隴西支裔益蕃以衆有族於閩者其稱蓋久先君之十二世祖諱岑由閩徙溫居柑溪之蒼墩四世祖舒州太守諱異始遷於利仁里舒州一子諱伯鎬爲南康軍司戶參軍司戶有子八人先君之祖怡堂翁諱居仁於倫次爲四監衢州常山稅務呂卒怡堂有子二人其季處士諱叔彥夙嬰惑疾不仕處士實生三子先君其仲也先君諱永孫字公訓生道祐戊申二月辛丑少爲良子弟長爲賢

父兄家世習儒雖不以一藝自名而文翰過人遠甚天性孝友事祖妣孫氏至死葬祭無一不中於禮侍處士與妣孫氏溫清惟勤處兄弟無閒言待人不爲崖岸斬絕之行遇鄉閭有急輒□□之不吝金穀費由是聲名益彰衆咸稱爲長者先君容貌魁偉端重平居不妄喜愠惟嘗節會集與賓朋兄弟子姪盡情極歡甲申歲元夕長幼聚宴酒半忽得痺疾執因母周氏手欲有所言而不能言次日索楮筆復不能書竟以是月十九日戊辰長逝年三十有七聞者莫不流涕嗚呼痛哉娶同里鄭氏男三人堂堂塾塾爲叔父後庚寅歲四月癸卯諸孤忍死奉匱葬於邑之西

廬山未果乞銘□□姑叙其槩納諸壙孤子屋泣血謹
識姻末前承議郎帶□□文思院通判慶元軍府事王
漢老填諱

李永孫壙在五十都 篇中執因母周氏手疑當作因
執上云妣孫氏此云母周氏周或其生母也

溫州路重建廟學碑 高九尺九寸二分廣五尺篆額字徑六寸文二十五行行四十五字行楷

書徑一寸餘

溫州路重建廟學記 篆額

承事郎江浙等處儒學提舉□謙撰并書

中奉大夫江浙等處行中書省參知政事李朵兒赤篆

蓋

昔謝康樂守永嘉招學講經則自司馬渡江有學舊矣厥後沿革廢興以時宋天禧己未改建於九星宮故基卽今址也治平乙巳紹興庚申兩延於災其重新也必增美焉嘉熙甲戌徧葺之尤麗水心葉文定公爲記

皇元混一至元丙子冬郡灾惟學獨存延祐改元八月又灾乃燬及之時學帑赤立多士軫憂總管忽辛公初視事與同知朵帶公慨然曰政無急此一志畢力悉以養士租爲度材鳩工費不給則量儒人力助之而郡寮又無不協相者是年十一月大成殿成會總管奉檄經界江東同知

獨任其事四越月總管還治喜曰微同知力不及此於是
廊廡殿門講堂齋序庖廩爲屋百有四楹櫺星門三南爲
亭二繚以周垣百廢具興又植松檜竹石前後映帶以爲
章縫藏脩遊息之地是役也經歷孫德裕府史王偉儒生
曹錫陳杞周習甫服勤程督皆能殫力承意以相之分憲
按視至喜且趣丹雘之未備者宏規偉觀視昔有加矣旣
而監郡脫帖木兒公至任而朵帶公書滿於四年之夏同
知禿孛歹公來代詣學顧瞻輪奐與監郡咸歎曰是知急
先務矣不可以無紀文學掾孔文定章填前後一詞來請
記余乃爲之言曰嗟夫人力之有有功於學棟宇可新也人

心之罔功於學習俗有未新爾東嘉學校士自昔文風爲
兩浙最當以時文進取雕刻綺麗惟以悅主司釣科名爲
務水心所謂兢省以禦物欲彌綸以通世變者自其身而
推之天下者未免以逐末忘本事外忘內壞之今庠序復
新於人力矣洗人心而一新繫誰力乎克己工夫是斷是
斷也切磋問辨度薨薨築登登也下學而上達升堂而入
室百堵興廟奕奕也其用力之方在己而已由人乎哉夫
當延祐改元奉

明詔以德行舉人以經術試藝詞章次之浮華所不取猗
歟盛哉此作新人心一大幸會也乃庠序之新亦在是年

天時人事得非有數存耶東嘉士其欽承

天子明命惟新是圖則學之有功於人又大矣中議大夫
温州路總管府達魯花赤管內勸農脫帖木兒奉訓大夫
同知温州路總管府事禿孛歹朝列大夫温州路總管府
治中楊彥祥承信校尉温州路總管府判官薩的彌識
承直郎温州路總管府推官趙許承直郎温州路總管府
推官蔡汝霖承務郎温州路總管府經歷孫德裕將仕郎
温州路總管府知事陳天祺將仕佐郎温州路總管府提
控案牘兼照磨承發架閣王孝本温州路儒學學正章瑱
學錄林棐監造敦武校尉温州路錄事司達魯花赤忙古

延祐四年

月

日昭信校尉温州路永嘉縣尹兼

勸農事何玉從仕郎温州錄事沈圭□□督□□□教

授劉景淵

督修學職戴可大王與□

陳潛國永椿

末兩行自學正字起有改刻之文蓋其上錄之如左

儒學正章大澤學錄林棐監造敦武校尉温州路錄事司
達魯花赤忙古歹從仕郎錄事沈圭延祐五年仲春亞中
大夫温州路總管兼管內勸農事趙鳳儀立石府史金悅
温州路儒學教授劉景淵

右碑在府學大成門外左側篆蓋者李朵兒赤至元中
曾爲温州路總管同知朵帶府志作朵解周習甫府志

見學錄又見樂清教諭脫帖木兒志作脫帖木爾孔文
定見平陽志薦舉南昌教授學正章墳府志見教授錄
事司達魯花赤忙古歹志不載當是以錄事攝此官樂
清達魯花赤有忙古解解同歹又同知温州路總管事
王忙古解當卽此人錄事沈圭志失載文中所列銜名
甚詳有官有階其稱謂足資考證後二行有改刻形迹
筆畫重沓細審可辨其改刻補入者爲章大澤趙鳳儀
金悅三人考鳳儀戴侗六書故序延祐戊午予來領郡
則其莅溫也在延祐五年碑立於四年無鳳儀名今乃
補改延祐五年削何玉銜名鐫入己名趙公賢者宜不

出此不可解也文中嘉熙甲戌徧葺之水心葉文定公
爲記宋史葉適本傳謚忠定今水心祠額及墓碣皆文
定此篇亦稱文定或是宋史偶誤嘉熙甲戌乃嘉定之
訛臨文失檢耳

先師像石碣高三尺六寸六分廣二尺六寸二分像劍佩
左向拱立高二尺四寸趙跋十三行行八字
行楷書徑八分盧跋四行行二十九字小楷書
徑五分余跋四行行三十字小楷書徑五分

鳳儀來牧三年儒人林垚出示其祖式之所藏摹本

宣聖像乃宋開禧乙丑典教嚴陵日於大成殿前廟土
所得古碑也德容之盛春溫秋肅與造化並他本皆不及
敬鑄於石置之甌類至治初元二月甲子亞中大夫溫州

路總管兼管內勸農事趙鳳儀謹識

右在像下方

萬厯丙戌春余自閩抵甌越明年秋日散步黌宮回翔聖座陰見一碣久仆塵土扶而諦觀乃先師像也余愀然肅然躬爲洗磨遡其自來甚異夫聖道如日中天余獲慶逢真像敬爲修整摹以廣傳俾人人共睹意者東甌文運之一新歟謹跋庚寅秋望訓導閩人盧性愚識

右在像右方

萬厯辛丑春嚴陵余尙友教授甌庠見

先師像石碑一片在

聖座龕後且仆地起視前識乃嚴陵遺刻其來遠矣與寮友陳宗典徐紹先趙大蔭鍾仁寵亟請府修黌宮因同邑四尹周部議勅臺豎碑以肅瞻仰謹識

右在像左方

右碣在府學大成殿 聖座後用方尺甃築小平臺約高六尺許上作小龕深一尺陷置壁間今尙完好如新余尙友遂安人府志誤作金尙友陳宗典已下四人皆府訓導明制郡學有四訓導也林式之上舍釋褐見郡志選舉不言其爲嚴州教官畧之也

太玉洞天古井題字

井以青石六方甃成井闊每方一字橫列陽文徑一尺許題款四行行四

字在太字外面陽
文徑二寸皆正書

容成太玉洞天

至治癸卯菊月丙申朱善敬立莊嚴勝事

已上四行
行四字

井在縣學教諭署內聚英堂之右華蓋山舊有容成洞
道書謂天下第十八洞天黃帝時容成子於此上昇名
容成太玉之天元時山麓建容成道院此題莊嚴勝事
爲道院物無疑爾時山下尙有元妙觀均徧近學宮明
中葉始遷別所地歸於學六字俗傳爲右軍書殆不可
信阮相國以爲山上磨崖亦誤井水頗甘美別有丹井
在崇聖祠後西牆外王光蘊所謂邑庠之後是也或目

此爲丹井實未見彼井耳

王儒志先生像碑

高五尺七寸廣三尺三寸文七行前四行行十六字後三行行十七字正書

永嘉理學儒志王公遺像

篆額

陽春其盎良玉其溫扶輿所鍾噩噩渾渾

東山講道學是尊當伊洛之未作承洙泗

之淵源杜淫邪路闢皇極之門儒志一編

闡道之原賢良三策衛道之垣功扶世教

澤裕後昆使天假年安知其不扣聖人之幽

闇也耶 元泰定丙寅夏季月望後三日正

議大夫海南海北肅政廉訪使王都中謹贊

右碑在府學鄉賢祠原刻舊在先賢祠嘉靖壬子移置
東山書院與今重建東山書院碑及祀先賢儒志碑並
峙已漫漶不可辨此乃重鐫之本篆法甚劣鐫手亦不
佳輿誤作與垣誤作恒訪誤作坊道字下脫一字邪字
下脫之字王都中字元俞福寧州人元世祖時兩浙都
轉運鹽使司又前爲浙江宣慰司

重建縣學碑

高七尺廣三尺九寸五分文
二十四行行三十八字正書

永嘉縣新學記

篆額

文林郎前江西等處儒學提舉東陽柳貫撰并書篆

温州治永嘉今永嘉爲上縣而温州爲大府府有學縣亦

有學猶黨庠遂序之異名而同以化民成俗爲義也永嘉舊學在府城東陬華蓋山下延祐甲寅燬明年令何君王作禮殿三年令王君貢作門廡講堂基構粗立而墜茨塗堊未底厥功越十四年爲至順辛未趙君塔納字敬叔繼至諗於衆曰縣實有民庶而能教則由教以之道而學其器也 聖師臨之吾敢不飭於是擇日授圖簡材比物士薦其羸工售其巧凡新作絃誦之齋十六楹間而自殿及堂門闥窗瑣之當髹飾者庭霑陞祀之當加甃者咸考度以致其工像繪合章尊俎應式宿有次舍限有垣墉族庖計廩位置左右觸目具美不陋不奢旣釋奠告成君復諗

曰凡茲學功有賢府侯以爲之管籥有縣長貳以爲之鐘
呂故吾得上下受畫以敦事於其間今庠舍苟完弦歌之
徒亦稍集矣然則學豈徒器而已乎乃使來請文表示學
者蓋古者學必有 先聖 先師之祀自始入學而皮弁
祭菜學入官而宵雅肄三以夫人性本善而所以磨揉遷
革卒要其成者猶有待於禮銘樂治之功則示之以敬道
而責之以爲治固必有人焉耳禮五百家之黨萬二千五
百家之遂有民斯有學在黨曰庠有黨正以蒞教治在遂
曰序有遂大夫以明有功正歲之屬民讀法所讀者三物
之法也三歲之帥吏興能所興者三物之能也屬之帥之

其人則正與大夫其事則學與教焉而已政何適而非教
教何適而非道士生斯時見大節踐大義出聞詩禮之訓
入謹仁讓之習樂其事勸其功人人有尊君親上之心故
曰官先事士先志夫已仕之事卽未仕之志亦各有其職
焉惟不以政自爲政教自爲教則興學以範民無非道器
之所寓舍器而論道是謂誣道吾不謂之道矣趙君學古
知方篤行自脩其爲永嘉甫朞月耳民旣樂生士亦趣業
君不以爲泰而獨汲汲焉惟學之爲務又欲徵吾言以申
倣之然則世之尙觀美侈名譽者以爲儒者例不知政何
其謬耶泮宮旣作而魯侯之德以明鄉校不毀而子產之

仁益信謂吾稔於趙君而溢於辭豈知言哉是役也縣教諭信安沈元鼎實終始宣勞法宜牽聯得書書之所以嘉善而勸來壹是春秋之義也明年至順三年其歲壬申春二月甲子謹製

府提調官通議大夫温州路總管兼管內勸農事伯答爾承務郎永嘉縣達魯花赤兼勸農事脫阿

承務郎永嘉縣尹兼勸農事趙塔納

從仕郎永嘉縣丞曹洪 將仕郎永嘉縣主簿梁玉

永嘉縣尉季琯 永嘉縣儒學教諭沈元鼎 王申之刊

右碑在縣學大成門外筆意野逸可觀伯答爾府志作

伯達兒趙塔納作趙搭納柳貫集亦作搭納浦江人物
志趙大納一名良勝遷永嘉令有惠政塔也搭也大也
音相近元人姓氏多可假借也季瑄龍泉人府志誤作
季瑄其子卽大納瑄柳貫字道傳浦江人

大廣化寺石夾題字

至順三年壬申歲六月庚申當山□□捐資建立

右刻在五十都

李燾墓誌

十六行行十
二字隸書

季弟燾字子載姓李氏世居永嘉蒼墩曾祖諱義和妣包
氏祖諱夢召妣張氏考諱當孫妣陳氏□□氏子男思婦

鄭氏女孫曾□□於至元甲申十一月丁酉卒□泰定丙寅十月丙子以元統乙亥閏十二月庚寅葬於里日溪障隴之原兄默□□壙默之長子怡從葬焉怡字士悅生於大德丁未三月辛巳卒於元統甲戌七月壬辰娶戴氏姪從姑也子男二伯已仲升於戲維四兄弟季特出類子姓凡十怡長安粹謂宜克家年胡不遂東池有蓮載擢其瑞喪此家寶祥實爲異式藏於斯百世永裕

右李燾墓在柎溪李夢召見靈山院鐘題名燾墓左近有李氏十四世墓碑文篆隸二體均可觀惜無紀年附於燾誌之後

蒼坡李氏墓碑

附書後十字篆

蒼坡李氏十四世墓

分四行
行二字

開十六府君妣孺人陳氏

分二行
行五字

大廣化寺石路紀年

至元三年丁丑六月日

右刻在三門外路石之側三年丁丑乃順帝至元也

大廣化寺井闌題字

前四字字徑七寸後二
行字徑一寸均正書

錦巖源泉

至正己丑冬比丘文偉立

右井在寺中

大廣化寺鐘款

高四尺一寸銑厚一寸下圍七尺八寸凡二層層各四區

當今皇帝萬歲

五十都鎮上里鶴陽新安任謝祥衆捨古鐘入寺舊損無聲今口震房謝毅孫自己捐財命工重造永充大廣化寺中佛殿受用祈保身躬康泰家眷平安伏請三寶證明諸天炳鑒至正己丑臘月誌募緣僧文偉了心

右鐘在佛殿前

橫井巷大井題字

井闢石六方其面東一方橫列天宿二字徑四寸下兩行字徑二寸末行畧小

皆正書

天 至正庚寅

宿 臘月吉日

信士徐願道重建

右井在東門內華蓋山下橫井巷

重建譙樓碑

高一丈一尺餘廣六尺四寸二分篆額無存文二十三行四十一字行末一字陷入土中

正書徑二寸末土民一行較小

重脩温州路譙樓記

從仕郎福建行中書省檢校官林彬祖撰

集賢直學士亞中大夫兼

皇太子贊善陳達刺麻實理書并篆額

至正二十有五年江浙行省右丞方公旣新温州之譙樓

士民鮑鉉等以狀請彬祖記其事按譙樓建自宋之淳熙中高六楹左右翼各四楹聯以兩廡東西百步累甃爲址下通廣達上設更鼓千里耳目攸屬延祐中郡守趙鳳儀嘗一繕脩更厯四紀風雨彫剝每憚其役重因循弗理公旣分鎮署郡治顧而歎曰何得不葺然不可勞吾民乃遂出帑金治之於是工師選才山澤出藏陸輸水轉遠近畢達陶人冶師咸曰子來梓匠效能出機若神弱變爲強腐化而堅仆者以植欹者以貞缺折以完梁柱桓桓棟危聿隆巨細口能因材庀庸新故相贊交致其功屹如虎踞翼若翬翥周阿峻直中通外飭塗之丹雘輝彩交燭

無異撤口舊而新是作是役之費白金以兩計者二千有奇諸匠以工計者二萬五千有奇役始癸卯冬十月至是口功而民不知擾郡屬文武官吏與其民士環列仰視莫不歎息而頌公之德咸謂公之報

國也忠故其恤民也勤公之鎮溫也內清山賊外遏淮寇歲督海艘轉漕於京師每念僭亂未平寐不安枕口游卒以爲勁兵斥浮費以充軍實禮賢任能務農通賈武備增脩而功實益著矣至正十八年公以行省口鎮撫來鎮明年擢行樞密院判口又明年升同僉二十一年進僉書院事公之弟元帥亦陞判樞佐公鎮口明年拜閩省參政

兼僉院鎮禦如故院判亦進秩同僉二十三年公陞江浙
左丞同僉陞僉院明年進公右丞

賜分省印章僉院復陞副樞

朝廷倚任日隆公報效彌至公知邦本在民故勞民之事
惟恐及焉況麗譙政令所出而□□無事治之充□□也
人其有盬矣彬祖以己亥冬來是邦凡士民所狀多親見
而知之者又茲役之美宜□□以示後來□□□不文辭乃
遂載其事於石公名明善副樞名文舉是年歲在乙巳正
月八日記

榮祿大夫温州路總管府達魯花赤兼勸農防禦事

八十六

□順大夫温州路總管兼勸農防禦□□□與侃
士民蔡德明何元葉□□□□□張友□□
□□朱新福林炳宗立石

右碑在府學鄉賢祠阼郡之有譙樓攷府志梁開平初
錢氏始築內城又名子城名勝志云舊州治在譙樓大
街正北是也元至元十三年廢爲民居止存譙樓門址
此文云譙樓建自□宋之□宣熙中而不及錢氏疑南門
內別有一譙樓不然學宮距舊州治里許何以碑不立
於彼立於此耶所稱江浙行省右丞方明善乃國珍之

姪時國珍擾溫台慶元三郡屢撫屢叛至正十八年戊戌遣明善分據溫州凡十年至丁未與國珍同降於明林彬祖麗水人至正乙酉進士爲永嘉丞進福建行中書省檢校官末第二行溫州路總管兼勸農防禦□□□□與侃禦字下剝蝕四字疑卽鮑與侃考台州志鮑與儔黃巖人元溫州路總管郡志方明善出降時其妻鮑氏裂絹爲旗命吏書投拜二字至西門鮑與侃阻之此二人似皆明善妻之兄弟而先後莅溫者也郡志職官俱失載

普濟寺鐘款

高六尺七寸上圍一丈餘腰圍一丈二尺四寸下圍一丈四尺三寸橫界三層每層分六

永嘉縣志

卷二十二

聖

區下層字跡無存
助緣姓氏不錄

□延

聖壽萬安

至正二十五年□齋主簿孫杞□吏黃伯祥照磨杜孟高
浙東道都元帥府經歷王錫

右鐵鐘在四十六都壺山麓普濟寺寺今移建巽澤里
改名普安寺鐘久陷土中字多破損

謝瑀鶴陽題字

三字篆書

蘭玉臺

至正□巳年謝瑀書

考至正有辛巳癸巳乙巳未知何年鶴陽在五十都謝氏世居於此康樂公之後也

永嘉縣志

卷二十二

藝文

序

永嘉縣志卷之二十二